

# DÌPWEKÈSHÈ



[Mwaneetu Neville udi uleeja Mwaneetu Branham—Muf.]  
Kaa, Mwaneetu, bikengela witabeku ne eci ncikuma's. Ndi muswe anu bwa kufila dimanyisha pa dîbà adi ne: "Biikale bilongiibwe mwaba ewu ne: bwa mêmè ndyelela paanyi meeji bwa cintu bu nanku awu." [Mwaneetu Branham ne disangisha badi batudika mu tuseku.]

<sup>2</sup> Ncya bushuwa ne ntu ngumvwa disanka dya kwikala kaaba aka misangu yônsò. Lwendu lwetu lukaadi pabwîpî ne ndekeelu walu mpindyewu, bwa dishaala dyetu neenu. Bwalu, tudi ne disangisha dikwabo dilwalwa anu abidi adi panshi aa mu Chicago, nenku bidi bikengela bwa mêmè kwaluja kataataka fa—famiye mu Arizona. Ne bôbò biine kacya kabatu banji kupetaku diikisha dyabo dya movù wa luuya to, nenku ndi ne cya kubangata kuya naabo mu mwaba kampanda mu kaalwendu kakese kaa mu mashinyi, mu matuku makeke adi panshi aa. Ne pashiishe nêngikalè pâmwâpa muumuke munda mwa dituku dimwe, dimwe, dimwe dya ku maadyalumingu, ne pashiishe lumingu lwalonda mêmè kubanga mu Chicago. Pashiishe nebikengele mêmè kwalukila buludi, mu dimwe kampanda, bwa kuya naabo ku Arizona.

<sup>3</sup> Nenku mpindyewu ntu anu ngumvwa bingenza bibi bwa kulwa mu dyalumingu mu dinda, kwangata dîbà didi bantu bônsò biikale mu citaleela adi. Mu dyalumingu diloolo, nutu misangu yônsò anu bacyoke ne bazengele, mu dyalumingu diloolo; ne pashiishe kwaluja mudimu wa disangisha wa mu dyalumingu diloolo kudi mpaasata wetu, aci's—aci's ncyenze anu bu cibi. Kadi ntu ngumvwa bibi bwa kwenza nanku, paabi mu dyalumingu diloolo mmûndî muufwanyine, mu dyalumingu diloolo, kwenza disangisha mu dyalumingu diloolo, pa dîbà adi ndi ndama bantu too ne dîbà dipite bikole. Bâàbûngî baa kudibo badi balwa mwaba ewu biikale bafumina ntanta mule lwa ku sud—ne lwa ku nord kwaka, nenku biikale, kaa, misangu mikwabo bikengela bendeshe mashinyi muunya ne bufuku, anu bwa kufikabo mwaba ewu bwa disangisha dimwepele cyanaana, bwa pashiishe kwalukilabo. Nenku ke bwa cinyi ntu nditacisha bwa kucyenza mu dyalumingu mu dinda, pândî ndwa, bwa kubapa mushindu wa kwalukilabo.

<sup>4</sup> Beena lwendu badi balama mêmè abo, baa lulamatu, mushindu mwine wûndî ngaanyishapu cyôci aci's we! Badi bendesha mashinyi bapicila mu mabwe a mvula, mu mvula, ne mu bikwabo byônsò, bwa kufikabo mwaba ewu, bakosolola ditunga dijima, nkama ya kilomeeta, anu bwa kaadisangisha kakese kamwe cyanaana. Pa nanku aci cidî cyenza ne ndyûmvwè mwikale ne kusakidila kudi Nzambi, ne kudi biine bantu aba,

bwa dintwa dyabo dinene—dintwa dyabo dinene dya nyama ku mikolo, mu bîndî nteeta kwamba, ngambila bantu ne, ke Bulelela.

<sup>5</sup> Mpindyewu, mêmè ndi ngitabuuja ne eci ke Bulelela, ndi. . . ne mwoyi wanyi wônsò. Bu ne kuvwa cintu kampanda cya cishiilangane, cîmvwà mwa kwela meeji ne ke cidi citambe bwîmpè, ncyà bushuwa ne nunku mvwa—nunku mvwa mwa kwanji kuya. . . Ncyakulombaku muntu bwa kuyaye mwaba wûndî mêmè nciyi nganji kuya dyambedi to, bwa kujandula ne mmwîmpè anyi mmubi. Ncyêna mufwanyine kulomba muntu bwa—bwa kwelaye cidya, mu Nzambi, cîndî mêmè nciyi mwanji kwenza bwa kumanya ne m’Bulelela to. Dyambedi, cidi ne cya kwikala Dîyî dya Mukalenge, pashiishe ndi ne cya kwela cidya bwa kumona nî ncyà bushuwa. Nunku pashiishe piikalabi ne ncyà bushuwa, pa dîbà adi ndi mwa kwamba ne: “Vwila lwa *eku* nunku.” Nwamonu’s, ndipenga dya njila.

<sup>6</sup> Nunku, mpindyewu, ndi ngeela meeji ne bikengela bwa mwambi kana yônsò ikale wenza nanku awu, bikengela ànjî kuya dyambedi, yêyè mwine. Yêyè ngudi ne cya kwikala mulombodi, mulombodi wa bantu, kayi wa wamba cintu cidiye kayi mufwanyine kutwapu cyanza to, yêyè mwine. Bikengela twètù kuya ne kwikala balombodi baa bantu.

<sup>7</sup> Mu dinda emu, ndi mwenze dilabula dya pabwadi menemene, anu dyetu dya pabwadi edi mu cyambilu emu. Ne ciine aci, civwa lwà ku citupa cya ndekeelu cya Diiyiisha, ncivwa ne kiipacila kaa kucyamba mushindu awu to. Nwamonu anyi? Kadi ndi ngeela meeji ne cikaadi mene anu cimane kwambiibwa, ne kakwena cintu nansha cimwe cîndî mwa kwamba pa bwalu abu to bwa mpindyewu. Kadi pashiishe ndi muye kumbelu, mukadifile mu dicilonga.

<sup>8</sup> Nunku tuvwa benze kaacisangilu kaa famiye leelu ewu, kavwa anu kaa bânà beetu baa balume ne bakwabo. Maamu yêyè ukaadi mumane kufwa. Nunku tuvwa ne ciibidilu cya kudisangishila kwende kumbelu, kadi mpindyewu tukaadi tuya kwa Delores. Tudi bapicisheku cikondo cilenga cya dikema mu mapingaja emu, tuyiikila, ne Teddy uvwa neetu. Twètù kwimba misambu ndambu, kwelaku ndambu wa tusala ne bikwabo.

<sup>9</sup> Mpindyewu ndi ngeela meeji ne, pàmwâpa mu dyalumingu dilwalwa edi mu dinda, bu Mukalenge mwa kwanyisha, piikalabi kabiyi bitacisha Mwaneetu Neville to, mpindyewu ndi njinga kwenza disangisha dya dyondopa, diikale dilongolola paadi anu bwa dyondopa. Nunku ndi—nenku ndi ngeela meeji ne, ne Diiyiisha dya mu dinda emu edi, mushindu udibi bimweke Mukalenge mundombole bwa kuDiiyiisha, bwa kuDitwala, bivwa ne cya kutukoleshaku ku mwoyi ndambu mu mushindu kampanda, nudi numona’s, bwa—bwa—bwa kwitabuuja anu cya bushuwa. Tutu—tutu anu tunaya, ne tutu—tutu twela meeji

ku bintu bishiilangane ne twakula pa byôbi. Kadiashiishe pakaadibi bikafika ku diteetangana dya makanda, apu kaayi maalu umba ashintuluka's. Bu muvwa . . .

<sup>10</sup> Muntu mukwabo uvwa undondela, ngeela meeji uvwa mmwaneetu wa balume udi paanyima pàapa wawa, uvwa undondela kaa—kaabwalu kampanda leelu ewu, pa bidi bitangila muntu kampanda, mwa—mwambi kampanda ne wende . . . bamwe baa ku, umwe wa mu disangisha dyende, wamba ne uvwa mwa kwendela pa citupa cya mucu.

Yèyè ne: "Mpaasata, cya bushuwa, Mukalenge udi neebe."

Yèyè ne: "Ndi mwa kwikala mwambule citupa cya mucu paanyima paanyi apa, piine pândi nsabuka apu."

"Cya bushuwa, Mukalenge udi neebe." Ke kuyaye e kwenza nanku awu.

<sup>11</sup> Yèyè ne: "Ndi mwa kwikala mwambule citupa cya mucu, mwikale kabidi ngenda mpuusa cinkalu pândi nsabuka apu, musangu umweumwe awu."

<sup>12</sup> "Cya bushuwa, Mpaasata, Mukalenge udi neebe. Diitabuuja dyebe didi mwa kwenza cintu kana cyònsò."

<sup>13</sup> Yèyè ne: "Ndi mwa kukuteeka mwine mu cinkalu amu, mwikale mwambule citupa cya mucu aci."

Yèyè ne: "Mpindyewu anji indila kakese!" Nwamonu anyi?

<sup>14</sup> Mbishiilangane paudi mubwejiibwemu's, wèwè mwine. Nwamonu anyi? Mpindyewu, aci, mbimpè bitambe bwetu twètù bwa kwamba apa ne: "Amen." Mbimpè bitambe bwetu twètù bwa kwamba ne: "Ndi ngitabuuja ne aci ncilelela." Kadi pa dîbà adi citeekaaku mu cyenzi's. Bikengela uciteeke mu cyenzi.

<sup>15</sup> Anu mûngâmbî diyî adi mu dinda emu ne, bantu bavwa badyadija mu mundidimbi wa Peetelo, kabayiku balomba nansha dibasambidila diine to.

<sup>16</sup> Nkaadi mubwelebwele mu mêtù àbûngî, ntangila ciine eci. Nsambila kumpala kwa kuya, ne mbwelamu anu cyanaana ne dilaabiibwa, ne nciyi nansha nsambidila bantu to, kadi mpatuka nya paabo bondopiibwa. Nwamonu anyi? Nwamonu anyi? Ncya bushuwa's. Nkaadi mucimonemone cyenzeke misangu bûngî cyanaana! Nwamonu anyi? Bikengela wikale ne mwaba kampanda wa kuteekelapu diitabuuja dyebe. Bidi bikengela bwa wèwè kuciitabuuja. Nenku mêmè ndi ngeela meeji ne dîbà adi dikaadi dyenda diseemena, ne dikaadiku mpindyewu.

<sup>17</sup> Nenku ndi mfika ku dyumvwa ne eci kî mmudimu wa dikwata dya mikaba ya mèyî to. Mbafwanyine kwenza kaamukaba kakese bwabo bôbô biine, kadi ewu kî mmukaba udi uya mu ditunga dijima to. Kudi . . .

<sup>18</sup> Cîmvwâ ngamba mu dinda emu eci ncitutumune too ne mu—mu katongobela, nenku ke bwa cinyi nêngangaté

dyalumingu dilwalwa edi bwa mudimu wa dyondopa. Bwalu, kacya anu ngâlukila kwanyi, ndi munulondele pa bidi bitangila bikeena-kumona ne pa cidi cyenzeke, ne bikwabo byônsò, ne mucyũmvwije, bwa cinyi ndi mwenze biine bintu byônsò ebi. Ne pashiishe mu dinda emu, ngenda mbyumvwija too ne ku Nkokelu wa ndekeelu awu.

<sup>19</sup> Mpindyewu dîbà dyanyi dya kudilambula kudi Nzambi dyākũmbanyi; dîbà dya Nzambi bwa kwakula naanyi. Nwamonu's, ndi—ndi—ndi ne cya kupeta anu dishintuluka dikese mu nsòmbelu wanyi mêmè mwine. Kî mbwena kwamba ne ndi ngeela meeji ne ndi ne lwonji to, kadi ndi—ndi muswe kudyumvwa ndambu pawîpi menemene ne bantu. Nwamonu anyi?

<sup>20</sup> Bantu biine bântù muditacishile bwa kwambila Evanjeeliyo wa Bulelela ewu abu, kadi biikale baMwela nyima, ne buumuka baya ne baMuseka. Nenku, bwanyi mêmè, aci's ncyenze anu bu cipendu. Ncyêna mbicyuka to, bwanyi mêmè; kadi bwa bintu bîntù ngamba, Cidi m'Bulelela budi buteeta kubakwacisha. Bidi anu bu kusaka bwâtù, wamba ne: "Mona, mbwòbò ebu, sabukaayaaku! Monaayi, umukaayi mu musulu udi mûle awu, nenufwe! Nwênù, s'nenufwe muntwamu!" Kadi bôbò biikale anu bakuseka, buumuka baya. Ee, bwanyi mêmè, ndi ndyumvwa anu bu ne, bôbò buumuka baya, kakwena cikwabo cintu nansha cimwe cîndîku mwa kwenza pa bwalu abu to, nwamonu's, cîndîku mwa kwenza.

<sup>21</sup> Kadi ndi muswe kupweka lubilu ngenda ngendela ku mwelelu wa musulu mpindyewu bwa kubaswisha ne: "Alukilaayee!" Nwamonu's, bikengela ngikale ndyumvwa mushindu awu, nwamonu's, bwalu ndi mumanye ne kudiku anu muntu kampanda pambelu pàapa udi kayi mwanji anu kubwela to. Nenku nêngikalè—nêngikalè anu ndoba too ne. . . Yèyè wakamba ne, too ne paakwaciibwa mushipa wa ndekeelu. Ke cîndi mêmè—mêmè muswe kwenza ncyôci aci.

<sup>22</sup> Mpindyewu, nenku mpindyewu, bwa kwenza ciine eci, ndi mutekemene bwa cintu kampanda cyenzeke mu disangisha kampanda dya milombo. Cintu kampanda. . . Ne bààbûngî beenu mbavuluke cikeena-kumona cya—cya Nkokelu wa ndekeelu, Nkokelu Mwisâtù awu, eyowa's we. Nudi bavuluke ne, kuvwa cintu kampanda cyenzeke anu kumpala mene kwa cyôci aci: Mwawa mumone Bukênkè abu bupweka bukabwela mu kaaba aku, bwamba ne: "Nêntwilanganè neebe mwômò amu." Mpindyewu ndi mwindile bwa cintu kampanda cyenzeke.

<sup>23</sup> Mwaba ewu kukaadi bidimu, bivwa byenzeka pa ciibidilu ne masangisha aa ne dijingulula bivwa mwa kuntekesha bikole be bya nshaala ntetuka. Bààbûngî beenu mbavuluke aci. Mwawa mukafike too ne mu mushindu wa nshaala mwimane ne bikengela bwa ndomba Mwaneetu Jack Moore bwa kwikala

munkwate ku diboko dimwe, ne Mwaneetu Brown ku diboko dikwabo, ne benda bangendesha tubanda tupweka ne mùsèèsù, munda mwa dîbà dijima paanyima paa disangisha. Nenku mêmè anu, byenzeka ne, mwikale nteeta bwa kwela meeji ne mpenyi—mpenyi pâmvwà nsanganyiibwa mene ne ncinyi civwa munkaci mwa kwenzeka. Pashiishe, bufuku bujima mwikale anu kacya ngaalaala mwaba awu ngeelanganapu meeji, nshikunkila ne bikwabo byònsò, mwikale ndikonka ne mbwa cinyi kabavwa biitabe Mukalenge wetu Yesu.

<sup>24</sup> Pashiishe Yèyè kungambila mu cikeena-kumona ne: “Musangu kampanda neutwilangane ne inàbànzà kampanda wíkala mwa kulwa kùdì, muvwale cya kuulu ne cya kwinshi bifiikuluke, ne neikale mwambule mwànà mukese mukùta mu mbulankete, ne kubangila anu mwine musangu awu, newikale ne makanda bwa kutwala abi ne mujooobo wònsò.” Ee, ntu munwàmbìle biine byònsò abi. Kwenzekabi mu Chicago, diloolo adi pavwa inàbànzà mutekete wa mu ba-Presbytériens, paakamutuma mpaasata wende mene kuntwaku ne mwànà wa mu diboko awu.

<sup>25</sup> Nenku ndi ngeela meeji ne uvwa mmwanaabo wa balume, anyi umwe wa kudibo, uvwa nga—ngangabuka. Kwambaye ne: “Kakucyenaku ditekemena nansha dikese bwa mwànà awu to amba anu Nzambi wa Bukole bwònsò mumulenge.” Kuyaye . . .

<sup>26</sup> Mukaji awu kuya kambila mpaasata wende. Mpaasata wende kwambaye ne: “Mêmè—mêmè ncyèna mukumbanyine to,” yèyè ne, “bwa—bwa kwenza cyenzedi kampanda pa dyondopa dya kudi Nzambi edi, bwalu ncyèna . . . ncyèna anu naadi mu mêmè to, diitabuuja didi dikengela bwa kucyenza adi.” Mpindyewu, aci, ke kwikala ne meeji matooke bwa bwalu abu nkwòkò aku. Nwamonu anyi? Kwambaye ne: “Ncyèna anu naadi mu mêmè emu bwala bwanyi.” Yèyè ne: “Kadi mvwaku mu dimwe dya ku masangisha a Mwaneetu Branham, nenku ndi mufwanyine kukubela bwa kwangata mwànà awu kuya nende kudi Mwaneetu Branham.” Nenku ngangabuka ukaavwa mumulekele, ne yèyè ukaavwa wa lufu.

<sup>27</sup> Nenku inàbànzà mutekete awu kubwelaye mwaba wûmvwà ngenzela di—disangisha dya mushindu kampanda bwa bânà bakese baa cyena Katolike bavwabo booshile mu mudilu abu, mu cilongelu cya kwine kuntwaku aci, nudi bamanye’s. Nudi bavuluke paakenzekabi apu. Tuvwa munkaci mwa kwenza disangisha adi, ke kulwaku anu pa cibumba cya ku cyambilu apu inàbànzà mutekete awu muvwale cya kuulu ne cya kwinshi bifiikuluke. Mukajaanyi ne bakwabo bavwa basòmbe mwaba awu, nenku mêmè kwamba . . . kukudimuka e kutangila, ne kukenzekana myaba yònsò, bwa kutangila ne bavwa mwa kwikala biimane mwaba awu. Ke kwenzekabi ne, anu kumpala mene kwa mêmè kulwa mwaba awu, ngeela meeji ne Billy Paul ne bakwabo abu bakaavwa bayiikile nende, anyi mukajaanyi

anyi bakwabo abu, bayiikile ne inábànzà uvwa ne mwânà mukese wa mu diboko awu. Ke inábànzà awu kubandaye pa cibumba cya ku cyambilu apu, ne Nyuma Mwîmpè kusokololaye cintu cyônsò nkòong, ne kwondopaye mwânà wa mu diboko awu anu mwaba awu.

<sup>28</sup> Mêmè kuumuka kuya, kadi kubangila anu piine apu ncitu kabidi ncyoka to. Nwamonu's, kabyena bintacisha to, ne ndi—ndi mutungunuke ngenda nya anu kuya.

<sup>29</sup> Mpindyewu ndi mwindile bwa cintu kampana cyenzeke, bwa mbanze Nkokelu Mwisâtù awu ne kuya nende buludi. Nwamonu anyi? Nenukumwapa disangisha dya dyondopa dya mu dinda dya dyalumingu dilwalwa edi, pàmwâpa necipatulè cyôci aci. Ncyêna mumanye to.

<sup>30</sup> Ngeela meeji, cyetu twêtù cya dyenza, ncifwanyine kwikala anu cya kumanyisha beena dyenu, kulwa ne babeedi. Mpindyewu, bwa disangisha dya dyondopa, bikengela twêtù kudifila ku babeedi. Nulwe ne babeedi beenu, ne nulwe naabo mwaba ewu kumpala kwa dîbà mu disangisha dya dyondopa dya mu dinda dya dyalumingu dilwalwa, twâmbè ne bu pa dîbà mwandamukulu anyi dîbà mwandamukulu ne tusunsa makumi asatu, nenukumwâmbè bwa kubapabo twarta twa disambila piikalabo babwelela ku ciibi apu, mushindu wônsò udibo bacyenza awu. Nenukumwâmbè netwënzè mulongo wa babeedi ne netusambidile babeedi, ne kumona anu ciikala Nyuma Mwîmpè mwa kwenza aci.

<sup>31</sup> Ndi ngitabuuja ne Yêyè neënzè maalu a kukema bu twêtù anu mwa kuMwitabuuja, nwamonu's. Kadi bikengela twêtù kuMwitabuuja bwa ciine aci mpindyewu, ne mwoyi wetu wônsò. Nenukumwâmbè ne dîbà dinene ndimane kulwa dya piikalaba Nzambi, mu mushindu wa bu mutuvwa twamba mu dinda emu awu, mmutuleeje byâbûngi be, ne mmukatufikishe too ne ku cintu kampana... mututuntumune anu too ne mu cipidi kampana. Anu bwa kupuusa too ne ku luseke lukwabo lwa kakuna kakese aku, ne cyôci aci ke cyônsò cidi cinukengela, pashiishe ke cyôci ciyaaya cyacya. Nwamonu's, ci—ciya anu muvwaci menemene amu, cintu cimwecimwe aci, ciikale ne dijingulula, cintu cimwecimwe aci ku ciprofeta, bwa kutangila.

<sup>32</sup> Mvwa mwimane mu Calgary... numfwileku luse, muvwamu mwimane mu Regina, Regina. Nenukumwâmbè bwa mwimane mwaba awu, ne twêtù musumba mujima. Nenukumwâmbè ukaavwa mungambile, anu mwaba ewu pa cibumba cya ku cyambilu apa ne: "Nebyenzeke ne, neumanye maalu masokome mene a mu mwoyi yabo." Nenukumwâmbè bwa mwimane mwimane ndyelela meeji bwa cyôci aci mu mushindu awu to. Mêmè kubanda pa cibumba cya ku cyambilu diloolo adi, ne Ern, e kubanga anu cyanaana kusambidila babeedi. Kadi ke muntu mulume ulwalwa ewu, mêmè kwadija anu nsômbelu

wende mujima patooke; musangu wa nzanzanza wa cyôci aci kwenzekaci mushindu awu, mu katanci kakese, mu disangisha dya dyondopa. Ke pashiishe mêmè kutuma mèsù mwamwa mu bateeleji, ke Cyôci eci cibanga kupwekela kumutu kwa bateeleji ne bikwabo. Kaa, patwikala tukaadi bakafikile dyamwamwa's we! Cyabibidi cimwe katûtukù banji kucilondelangana to, cya biine bintu abi, cya kutangila, ne kumona maalu mu nsòmbelu ya bantu. Ncyèna ngambaku kantu nansha kamwe pa ciine aci to. Ndi ncilekela anu nanku, nwamonu's, amba anu mu bulelela mêmè mwenzejiibwe ku bukole bwa kwamba cintu kampanda's.

<sup>33</sup> Nenu mpindyewu ndi mwindile cikwabu eci bwa kubangaci anu mushindu awu. Nwamonu's, Nzambi, mu mushindu Wende Yèyè mwine, mu cikondo Cyende Yèyè mwine cya budishikaminyi, bwa kucibanga. Nenu neciikale—neciikale cintu cikwabo citambe ciikalà—ciikalà citambidile kupita cyònsò cya ku bikwabo bibidi ebi. Nwamonu anyi? Nenu ndi mwindile bwa cyôci aci cyenzeke.

<sup>34</sup> Ne pàmwăpa, mûmvwà ndyambidila, bu mêmè mwa kwenzaku kaadisangisha kakese kaa dyondopa mu dyalumingu dilwalwa edi. Pashiishe dyalumingu dyalonda adi nêngikalè pàmwăpa mumane kuya ne bânà ne bakwabo abu, bwalu bidi bikengela baalukile bwa kuyabo mu kalaasa. Nenu pa dibà adi mu dyalumingu dyalonda, mêmè, mu bushuwa bwa bwalu, nêngikalè mu Chicago, ku disangisha dya kwine kuntwaku. Ne pashiishe ngalukila mu dimwe dyalonda, bwa kuumuka mu diibidi bwa—bwa kuya ku Arizona, bwa bânà kwalukilabo mu kalaasa.

<sup>35</sup> Ee, cyûdi wêwè musangane ncinyi, mpaasata? [Mwaneetu Neville udi wamba ne: "Ee, mêmè's ndi mujandule kantu kampanda kaa pabwaku menemene."—Muf.] Bîmpè, abi mbilenga be, mpindyewu tudi baswe kuumvwa kantu aku.

<sup>36</sup> Pa nanku mpi—mpindyewu Mukalenge anubeneshe bònsò bwenu, bikole, bikole menemene. Nenu ndi—ndi ntekemena ne nênnùmônè mwaba ewu mu dyalumingu dilwalwa edi. Nenu mu diisâtù diloolo . . .

<sup>37</sup> Nenu teejeaayi. Kanwikadi nwâlwa kupwa mwoyi tuèkèleeziyà twa tukese etu to, bu mudi kaa Mwaneetu Ruddel, kaa Mwaneetu Jackson, kaa Mwaneetu Parnell, ne twa bânà beetu bakwabo baa batekete bònsò badi balwangana mvita mikole ya kâmpudimâta pambelu pàapa baba, nwamonu's. Ne bôbò abu batu badyumvwa bu ne twêtù tudi ekeleeziya mwanaabo—mwanaabo—mwanaabo kaaba aka, nudi numona's. Twêtù tudi anu bu kasumbu kakese kadi kabalele bôbò. Mwaba ewu ngudibo balediibwe, bapatukile mwaba ewu, bampaasata ne bakwabo.

<sup>38</sup> Nenu mukwetu wa mutekete udi lwa paanyima apa ewu, mwaneetu, mvwa mutwilangane nende diloolo kampanda

kwine aku, Allen, Mwakunyeetu Allen ewu. Ndi ntekemena ne Mwaneetu Collins ewu neabwele mu dimanyangana ne Mwaneetu Allen, piikalaye kayi mumumanye. Bubidi bwabo mbambi baa mu ba-Méthodistes, kadi mba—mbamone Bulelela bwa Diyì.

<sup>39</sup> Bidi ne, bu—bulongolodi bwa ekeleeziya wa ba-Méthodistes, badi mene anu musumba wa bantu balenga mu ekeleeziya wa ba-Méthodistes amu. Kanwikadi nwêla meeji ne kî mbantu balenga to. Mbantu balenga. Mudi musumba wa bantu balenga mu ekeleeziya wa Katolike mwamwa. Mudi musumba wa bantu balenga mu ekeleeziya wa ba-Presbytériens. Ne mu myaba yônsò ayi, mudi balume ne bakaji badi bindile bwa kumona dibateemena dya Bukênkè abu mu kajila kaabo. Tungunuka wêwê anu ne diteemesha Bukênkè, mu didipwekesha dyônsò, mu kalolo kônsò. Twikalaaayi twenda tuseemena bônsò pabwipi menemene ne Nzambi, mu kudipwekesha. Nwamonu anyi?

<sup>40</sup> Kanupu mwoyi to, tabernacle ewu neajimije makanda ende. Vulukayi ne yêyê ewu ke cintu cidì Sataana uludikila cingoma cyônsò cimana kulongolola cya mu iferno. Yêyê neafikishe muntu kampanda ku dyenza cintu cidì cibengangana ne cidì mukwabo wela meeji. Ke cidiyè wenza. Ke cidìYe munkaci mwa dyenza. Awu's ke wende mudimu, bu yêyê anu mwa kufikisha muntu ku dyamba cintu kampanda, muntu bwa kwakula bwa mukwabo, wambaku ne: “Ee, teeleja's, ukààvwa mumanye bidi *Kampanda* mwenze anyi?” Kuciteelejiku to. Kuciteelejiku to, nansha kakese. Awu's ke dyabulu awu. Wamonu's, n'Sataana awu. Kwitabuujiaku aci to.

<sup>41</sup> Piikalaku nî ncinyi nî ncinyi cidì muntu kampanda mwenze cya cibi, umusambidile. Kadi kusambidi mu mushindu wa citù to, wamba ne: “Ndi mumanye ne mbwalu bungenzeja padibu apa, bikengela anu nsambidile mwaneetu awu's.” Udi wangata bwalu abu mu mwoyi webe, bukubwela anu menemene, bwa mwaneetu wa bakaji awu. Nenu akula mwikale anu ne kalolo kônsò, nenku katanci aka, neumumone ukaadi mwalukile cyakabidi mu mudimu. Wamonu anyi? Bwalu, twamb'eku twamb'eku, tudi twenda tuya batangile ku dibwela dya dîbà.

<sup>42</sup> Mukalenge Yesu's ulwalwa dimwe dya ku matuku adi panshi aa. Nenu, nudi bamanye's, mêmè ndi ngeela meeji ne neciikale cya cintuluntulu menemene—menemene ne cya kalolo, mu mushindu wa ne nekwikale lukama pa lu- . . . cya pa lukama cimwe cya cya pa lukama cimwe cya baa pa buloba bwônsò kabaakumanyaku mene piikala Dyambwibwa mwa kwenzeka to. Nedyenzeke mu cinyaanya cya dikema mu mushindu wa ne muntu nansha umwe kayiku mufwanyine kumanya kantu nansha kamwe pa bwalu abu to. Nwamonu anyi?

<sup>43</sup> Nenu nekwikale, mu bushuwa bwa bwalu, tusumbu tukese netwâmbè ne: “Ee, mpindyewu, kadi *Kampanda*?”



44 “Kaa, s’nyawu bamba ne kudi musumba wa bakoleshi baa maalu kuntu kwaka, mbambe ne kasumbu kaa bantu nkuumuke mwaba mwine awu, ne badi. . . Kabyena nanku to. Mbapatuke baye anu mwaba kampanda. Twêtù’s tukaadi bapetepete diine dikolesha dya maalu adi, nwamonu’s.”

45 “Ee, s’nya’ bamba ne kaatabernacle kakese aku, mu mwaba udibo babiikila ne Jeffersonville awu, bidimba bya mwômò amu bûngì kampanda mbajimine anu nunku’s.”

46 Nudi numona’s, badi babenga ciine aci’s. Nebămbè ne: “Kaa, kakwena bwa nsongo mu biine abi to, wamonu’s,” mushindu awu, ne Dyôdì nediikale dimane kupita kadi bôbò kabayi bacimanyaku to.

47 Mu ditunga dijima, nekulwe, aba badi bafwe mu Kilisto nebabiike dyambedi. Dyambwibwa nedyenzeke, Ekeleeziya neangaciibwe aye Kumbelu. Nenukushishe Dikenga dikole nedidikume, ne, kaa, ekelekele, katwena baswe bwa kwikala apa mu ciine cikondo aci to. Mêmè ncyêna muswe kwikala apa mu Dikenga dikole adi to. To. Nzambi kiitabiku to bwa nansha umwe wetu adidinge ikale apa munda mwa ciine cikondo aci. Bwalu, “ewu udi mukooyike udi utungunuka ne kwikala anu mukooyike; ewu udi wa cijila udi utungunuka ne kwikala anu wa cijila; ewu udi mwakane udi utungunuka ne kwikala anu mwakane.” Kakwenaku. . . Mwânà wa mukooko ukaavwa mumane kulwa ne Mukanda Wende wa Bupikudi, ne Mukaji musela ukaadi mumane kuumushibwa. Aba baakadyombola Cyôci aci badi ne cya kupicila mu cikondo cya Dikenga dikole, ne beena Yuda ne baa Bisamba bya bende bônso. Cikondo kaayipu cya Dikenga dikole’s we! Mêmè ncyêna muswe aci to.

48 “Mukalenge, njidileku mpindyewu.” Adi’s ndilongesha dîmpè dya ci-Nazaréen, kî mmwômò anyi? [Mwaneetu Neville udi wamba ne: “Amen.”—Muf.] Kabidi’s ndilelela, dyôdì adi. Ndilelela. Ncyá bushuwa. “Nguje mpindyewu ne Nyuma Webe Mwîmpè, Mukalenge. Patula maalu ônsò a pa buloba munda mwanyì mpindyewu, Mukalenge. Ku—kutulekediku tupeta. . .”

49 Bu mwakamba mwaneetu wa balume mukulumpe wa bafiike awu ne: “Mukalenge, mêmè’s nkaadi ne ticket wanyì ku cyanza. Ûkaadi mumana kutubula. Pângààpwekà ku musulu, mu dinda adi, ncyêna muswe lutatu to.”

50 Nenukushishe kwikala anu cya bushuwa, ncyêna—ncyêna muswe lutatu to. Ikalu mukwate ticket webe ku cyanza, bwalu netusabuke. Elangana anu meeji pa bwalu abu, cikondo cinene cya bupikudi cikaadi pabwîpì.

51 Nenukushishe kwikala anu cya bushuwa, ncyêna—ncyêna muswe lutatu to. Ikalu mukwate ticket webe ku cyanza, bwalu netusabuke. Elangana anu meeji pa bwalu abu, cikondo cinene cya bupikudi cikaadi pabwîpì.

51 Nenukushishe kwikala anu cya bushuwa, ncyêna—ncyêna muswe lutatu to. Ikalu mukwate ticket webe ku cyanza, bwalu netusabuke. Elangana anu meeji pa bwalu abu, cikondo cinene cya bupikudi cikaadi pabwîpì.

ne: “Mwaneetu Snelling.”—Muf.] Mwaneetu Snelling ngudi mpaasata, nkaayende. Mwaneetu Snelling ngudi mpaasata mu Utica mpindyewu. Ngeela meeji ne disangisha dyabo dya milombo didi mu. . . [“Mu diinâyì diloolo.”] Mu diinâyì diloolo. Mpindyewu, nudi bamanye ne, mbifwanyine kwikala bilenga bu twètù mwa kuya kuntwaku mu diinâyì diloolo bwa kuleejaku bakwetu abu ndambu wa bwobumwe. Nwamonu anyi? Ne pashiishe piikala Mwaneetu Jackson, bikondo biikalaye ne ende pende, bu twètù mwa kudisangaku kasumbu kakese cyanaana ne kuya.

<sup>52</sup> Nwatungunukaayi anu ne kusambila, nutùngunuka ne dyumbula! Eyo, kanwimanyiku to. Anu bu mwakabambila Eliya, wamba ne: “Umbulaayi biina mwônso mwamwa!”

Pawikala mukafike panshi, wêwè kutuuta pa cikopokopo cya kale cya cyamu, newămbè ne: “Ngăcyòku byăpìcì” anyi? Wêwè umusha anu cintakanyi aci mu njila ùcímànshè utungunuka anu ne kuumbula. Wamonu anyi? Tungunuka wêwè anu ne kuumbula, bwalu bidi bikengela anu tuumbule. Bidi bikengela anu tuumbule, ke cyônso cidiku. Bwalu, pawikala—pawikala muswe kupanduka ku Dikenga dikole adi, bikengela ubange kuumbula.

<sup>53</sup> Nenu mpindyewu, bwanyi mêmè mwine, mwaba awu ndi munkaci mwa kudiyiisha mêmè mwine. Nêmbangè kuumbula too ne mu ndondo menemene kupita bya mûnkaadîku muumbulembule. Bwalu, mushindu wûndî ndyumvwa udi ne, mu ditunga emu ne mu nyungulukilu wa buloba bujima, mudimu wa bwambi ewu newuye cyakabidi, bu mudiwu mumanyike mpindyewu myaba yônso pa buloba bujima. Ndi—ndi ne cya kuya cyakabidi.

<sup>54</sup> Mukajaanyi uvwa ungambila. . . Dinda dikwabo, mvwa ngamba ne: “Ndi muswe bwa wâya naanyi pângâàya apu. Nênjuukè lwa ku ngondo wa kumpala, bu Mukalenge mwa kwanyisha. Ndi muswe bwa kwenza lwendu lwa dinyunguluka mu buloba bujima, mu nyungulukilu mwônso; mpingana kadi pâmwăpa kwenza masangisha mu États-Unis, misangu mikwabo mu muvù wa luuya ulwalwa ewu.”

Ke yêyè ne: “Nkaadi mutambe kukulumpa be bwa kuya.”

<sup>55</sup> “Ee,” mûngààmwambidì, “mêmè’s ndi muyè pâncìvwa. . . lwendu lwanyi lwa ndekeelu lwa dyamwamwa dya mbû, kukaadi bidimu bitwe ku mwandamukulu, kadi ndi ndyumvwa anu bu ne ndi mu mushindu mwîmpè mpindyewu kupita mûmvwà kukaadi bidimu mwandamukulu apu, udi mumanye’s. Wamonu anyi? Ndi mumanye byăbûngî kupita pa bwalu abu mpindyewu.”

<sup>56</sup> Ke pashiishe twètù kumata mu cyena bwalu cya ne: “Bu Mukalenge mwa kwamba ne: ‘Ndi muswe nkukosele bidimu makumi abidi ne bitaanu. Kwakupetaku butekete to. Newikale ne bukole bwa kuya, nenu Ndi muswe kukukosela bidimu

makumi abidi ne bitaanu pa buloba,' udi mufwanyine kwangata bya ku—kuumukila ku cileledi too ne ku makumi abidi ne bitaanu, anyi bya kuumukila ku makumi abidi ne bitaanu too ne ku makumi ataanu, anyi bya kuumukila ku makumi ataanu too ne ku makumi mwandamutekete ne bitaanu, anyi bya kuumukila ku makumi mwandamutekete ne bitaanu too ne ku lukama?"

57 Mpindyewu, muntu yònsò udibo bakosele cikondo kana cyònsò pa buloba apa ewu, ncyà bushuwa ne yèyè neenzè cintu citambe kwikala cya kayi mwele meeji to piikalaye kayi mupicishile ciine cikondo aci ku dikwacila dya Nzambi mudimu. Cidiye wenza aci nansha ciikale cinganyi.

58 Mpindyewu, piikalabi ne newikale mwabishi wa bakaji myoyi, anyi bikwabo, bikengela wangate bidimu bya bwànà abi, bidimu makumi abidi ne bitaanu bya ntwadijilu abi. Wamonu anyi?

59 Piikalabi ne newikale mukoonyi wa mabaya, mulongolodi wa mashinyi, anyi cintu kampanda, bikengela wangate bidimu makumi abidi ne bitaanu biibîdi abi. Wamonu anyi?

60 Pashiishe mêmè kubanga kudyambidila ne: "Kadi mêmè? Ndi mufwanyine kwangata byèpi?" Mêmè ndi mufwanyine kwangata bya kuumukila ku makumi mwandamutekete ne bitaanu too ne ku lukama. Ndi mufwanyine kwikala ne meeji matambe kutwa, mutambe kwikala wa lungenyi. Ndi mufwanyine kwikala mutambe kushimata. Ndi mufwanyine kwikala mumanye byàbûngì pa bidi bitangila cîndi ngenza. Ndi ne bidimu dikumi, mwandamukulu anyi dikumi, bipicidile pa bîmvwà naabi musangu wa ndekeelu wûngààkayà dyamwamwa dya mbû. Neyakwikala ne ciputuku byenze bu ne ndi nshipa nyoka to. Nêngikalè mumanye byàbûngì pa bwalu abu, nwamonu's. Ndi mumanye mwa kupita ne maalu.

61 Bidi anu bu mudi mbwa wa kutwa nende buluwà bwa nshimba mwikale ulwangana ne nshimba, nwamonu's. Udi mumanye mushindu wa dimukwata. Kwèna umuputukila to; neakwele nzadi. Wamonu's, bikengela umanye màyèlè ende ne utangile cidiye wenza. Nenku tudi tuyiila byàbûngì pa bidi bitangila mwena lukuna. Pa nanku bidi bikengela twètù kujandula ngenzèlu yende yònsò, ne mushindu udiye useemena, ne cidiye wenza, ne kulonga mùdi makofi adiye wela, pa dîbà adi udi mulongeshibwe mushindu wa kuya kamubunda, wamonu's.

62 "Pa nanku ndi ngitabuuja mpindyewu," mûngààkambilà mukajaanyi, "ndi ngitabuuja ne ndi mu mushindu mutambe bwîmpè mpindyewu kupita mûmvwà pâncîvwà ne bidimu makumi anaayi, muye kwine aku." Nwamonu's, kadi nkaadi ne bidimu makumi ataanu ne binaayi. Nenku ndi ngitabuuja ne, mêmè mwikale ne mwoyi ne mucikàle nyunguluka anu bîmpè mùndi ne mushindu wa kunyunguluka mpindyewu emu, pângikalà nkaadi ne bidimu lukama, bu mêmè. . . bu Yesu mwa

kunenga too ne kwine kwònsò aku, ndi mufwanyine kwikala mu mushindu mwimpè kupita wúndi mpindyewu ewu, bwa kuya. Nwamonu anyi? Bwalu, udi mumanye byàbùngì pa bwalu abu, udi mumanye byàbùngì pa bidi bitangila cidi cikengela kwenza, ne mwa kupita naaci mwine, mudi kupita ne bwalu budi bukukwate.

<sup>63</sup> Angataayi bantu bààbùngì mpindyewu, piikalabi ne badi ne cya kubàpanda. “Nya’ bamba ne ngangabuka mupyamupya mmujikije tulaasa twende dituku adi, ne mmufume ku dijikija mu tulaasa twa dyondopangana. Yèyè kacya katu mwanji kupandangaku to. Akupande yèyè’s.”

<sup>64</sup> “Kaa, bwàlà bwanyi,” mùdi mufwanyine kwamba, “abu kabundengi. Bwa awu mulumyana to. Bwàlà, mukalenge. Nansha nanku, to, bwèhe. Ncyèna muswe bwa yèyè awu angeele keele to. Ee, mbipiciibwe ne mèmè mupweke lwa kwinshi eku mukangate *Kampanda*. Ndi muumvwe bamba ne yèyè ukaadi mupandepande bantu bààbùngì. Yèyè ke udi mumanye mwa kubyenza.” S’ke mudici amu, nwamonu’s. Ke mmwenenu nyèyè awu.

<sup>65</sup> Nyawu wela meeji bwa eci, kadi bishi bwa musuuka awu? Mèmè ndi muswe muntu udi mumanye padiye mwimanyine, ne mumanye njila; ukààdi mwenzelumu lwendu awu. Eyowa’s, bushuwa.

<sup>66</sup> Mukalenge anubeneshe. Eyo, Mwaneetu Neville, bandaaku kuneeku mpindyewu. Ne Nzambi abeneshe Mwaneetu Neville. Kanwikadi nwàpwa mwoyi mpindyewu, dyalumingu dilwalwa.

<sup>67</sup> [Mwaneetu Neville udi wakula bwa Mwaneetu Branham ne Mwaneetu Vayle mu kasunsa kamwe, pashiihe udi wamba ne: “Kabidi ntu ne disanka dya kwakidila bambi baa Nzambi, nangananga aba badi bakwacishangana mudimu ne Eci, ne mu Cyôci aci pamwe neetu. Ntu ne disanka dya kubateeleja.”—Muf.] Amen. [“Pa nanku ndi mulombe Docteur Lee Vayle, mwambe ne: ‘Udiku mwa kwanyisha bwa kuyiisha, piikala Mwaneetu Branham kayi uyiisha anyi?’ Ne Mwaneetu Branham kî mmuyiishe to. Mmufwanyine kwikala mumanye ciine eci.”]

To, ncivwa mucimanye to. Ncivwa mene mwa kwikala mwakule mukùngùlù bulewù nanku awu to.

<sup>68</sup> [Mwaneetu Neville udi wamba ne: “Pa nanku ndi mulombe Mwaneetu Vayle, diloolo edi, ne udiku mwa kwanyisha bwa kutuyiisha, piikala Mwaneetu Branham kayi uyiisha to. Bwalu mmuswikakane nende mu masangisha, ne yèyè mmumanye pa bidi bitangila Njila, Njila ewu. Nenku tudi ne disanka dya kwakidila Mwaneetu Vayle. Ntu mmwanyisha ne mmuneemeka anu mûntù nneemeka yònsò wa ku bambi bakwabo, ne mûntù nneemeka bakwabo bònsò. Nenku bu yèyè mwa kulwaku diloolo edi bwa kutuyiisha, ndi mufwanyine kwikala ne disanka dîngì bwa kumupa mpunga wa kucyenzaye.”—Muf.] Amen. [“Nzambi

amubeneshe, nenku tusambidilaayi Mwaneetu Vayle. Bamwe baa kunudi kabatu banji kumuteelejaku to, kadi mêmè ndi mutwishiibwe ne nenumusambidile.”] Eyowa.

<sup>69</sup> Kabivwa bikengela bwa mêmè kwikala mwangate dîbà dyende dyònsò to. Ndi ndomba luse kudi bateeleji. Ncivwa mumanye ne, pavwaye musòmbe mwaba wawa apu, yêyè. . . eci cikaavwa cimana kulongolola to. Nzambi akubeneshe, Mwaneetu Vayle.

<sup>70</sup> [Mwaneetu Lee Vayle udi wamba ne: “Kacivwa cimana kulongolola to. Yêyè uvwa mwambe ne, bu wêwè ‘kuyi wakula to.’ Kadi’s nya’ udi mulwe.” Mwaneetu Branham ne disangisha badi batudika mu tuseku—Muf.] Bîmpè. Abi mbilenga.

<sup>71</sup> Ndi mpetaku paanyi mushindu wa kumuteeleja’s, mêmè mwine. Mwaneetu Vayle ukaadiku mwakulaakule misangu yàbûngì kumpala kwanyi mêmè, mu masangisha, ne—ne bikwabo. Yêyè ukaadi mulongololelongolole ndongamu ya masangisha kukaadi ntanta mule, wa bwalu mmwaneetu mulenga maalu be, mwenze mudimu mulenga wa dikema. Nenku ndi mutwishiibwe ne bateeleji aba batu misangu yònsò anu ne disanka dya kuteeleja Mwaneetu Vayle patuye wakula. Mukalenge abeneshe Mwaneetu Vayle.

<sup>72</sup> [Mwaneetu Vayle udi wakula munda mwa tusunsa makumi mwandamutekete pa Maako 16.15-20 ne pa Mifundu mikwabo, mufile cyena bwalu cya ne: *Maako 16 Kātu Mukwàte Mudimu Bwà Cinyi? Nè, Bilondèshìle Mifundu, Mushindù Wà KuMufikisha Ku Dikwàtà Mudimu—Muf.*]

<sup>73</sup> Byàbûngì byàmbiibù mu mushindu wa—wa—wa mêmè nciciyi kabidi mufwanyine kwamba kantu nansha kamwe bwa kubilengeja to. Ne mêmè ndi ngitabuuja ne Mukalenge nguvwa mulongolole cyôci eci bwa Mwaneetu Vayle kuyiishaye diyiisha edi, paanyima paa dya mu dinda emu adi. Nudi numona’s, bikengela biikale bikwata mudimu mushindu awu. Tudi—tudi twitaba ne aci cidì cifumina kudi Nzambi. Cidì, kudi bintu bûngì cyanaana bivwaye wamba; ndi—ndi—ndi ne mayiisha kí mmângi kí mmângi makumi abidi mafundiibwe mwaba ewu, afumina ku byàmbiye yêyè abi.

<sup>74</sup> Mwva ngeelangana meeji mwaba ewu pa cifwanyikijilu cikese kampanda, bwa kutwa bidiye mwambe abi nyama ku mikolo. Mpindyewu, tutu tutangila pa dîbà dya ku diboko edi, bwa kumona dîbà ditudi. Kaacyamù ne kaacyamù kònsò kaa mu dîbà adi kòkò kakayi kenda mu dinwangana, aka ne kaka, katwadyakumanyaku dîbà dya cya bushuwa to. Ncya bushuwa anyi? [Disangisha didi dyamba ne: “Amen.”—Muf.] Nenku bidi bikengela bwa twètù bònsò, bònsò cyapamwe, patwikala baswe cya bushuwa ne Nkokelu Mwisâtù awu ènzèku cintu kampanda bwa Nzambi, ndinwangana dya umwe ne umwe wetu bònsò

pamwe, bwa tudipwekeshe kumpala kwa Nzambi ne tutonde mibi yetu, ne tusambile ne twitabuuje Nzambi bwa bintu ebi.

<sup>75</sup> Ndi cya bushuwa ngitabuuja ne cidi Mwaneetu Vayle mwambe m’Bulelela, ne Nzambi kaadyakuteekaku Nyuma Wende mu ntempelu udi kayi wa cijila, mubi, wa cishiku to. To. Ûdi ne cya kulwa mu mu—mushindu wa dikezula dya myoyi yetu ku budimu bwônsò ne bubi bwônsò, bwa twamona mwa kwikala batooke zee kumpala kwa Nzambi, bwa Yèyè wamona mwa kukwata mudimu ne Nyuma Mwîmpè Wende mutooke zee awu munda mwetu, bwa kufikisha maaluu aa ku dyenzeka. Ndi—ndi ngeela meeji ne, panwikala baalukile mu mèènù diloolo edi, bu nwènù mwa kubalaku Kakanda kakese kaa Yuda aku, nenuyiile anu maaluu bûngì cyanaana mpindyewu a bidi Mwaneetu Vayle mwambe ebi. Ne yèyè mmwambe ne: “Ndi ndwangana ne mwanyi mwônsò bwa Diitabuuja dyakapabo bansantu musangu umwe bwa kashidi.” Bôbò bakaavwa baseesukeKu. Mushindu wakalwa bantu baa meeji manyanguke, ne bikwabo, kubwela ne kubaseeswisha bwa kubuumusha ku—ku bintu bilelela bya Nzambi.

<sup>76</sup> Ne Nzambi udi mwa kukwata mudimu anu patudi twètù tuMulekela ukwata mudimu. Nenku mudi bintu bûngì cyanaana bilenga bya dikema, bîndi ngamba. . .

<sup>77</sup> Nudi bamanye’s, bantu badi bajinga bukole, kadi mu bushuwa bwa bwalu kî mbamanye cidi bukole ne ncinyi to. Nwamonu’s, ncyá bushuwa ne kî—kî mbamanye ne cidi—cidi—cidi cyenda ne bukole bwine abu ncinyi to. Nji—njila wa dibanda muulu utu mmu dipweka, misangu yônsò. Pawikala ujinga bukole, anji tangila umone mushindu wûdì mwa kudipwekesha. Umuka wêwè anu ku ngeelelu webe wa meeji wa pa buloba awu, kadi udipwekeshe kumpala kwa Nzambi, nenku pa dîbà adi udi wêwè ne bukole kupita muntu udi unyeemakana mu citanda cijima eci mwikale wenza mutooyi mupitepite bûngì awu; wamonu’s, mbwalu udi mupete bukole bwa kudicimuna wêwè mwine, ne kudifila wêwè mwine kudi Kilisto, udi umona’s, kudipwekesha kumpala Kwende. Mu bulelela ke bukole mbwôbò abu.

<sup>78</sup> Undeeje ekeleeziya udi mudipwekeshe, mudipwekeshe anu menemene, kayi wa—wa madyambi to; ekeleeziya, ekeleeziya anu wa kalolo, mudipwekeshe, mêmè nênkuleejè ekeleeziya udi ne dyanyishiibwa ne bukole bya kudi Nzambi munda mwende. Ncyá bushuwa. Cintu cidi cikengediibwa ncyôci aci, kudipwekesha, biikale tudipwekesha kumpala kwa Nzambi, tulekela Nzambi ukwacila anu mudimu kutudi twètù. Kabyena bikengela bwa kwenza mutooyi mupitepite bûngì to.

<sup>79</sup> Misangu mikwabo, bu mwakamba cidime awu ne, wakapatuka kuya ku budimi ne ditempu dyende, kadi, musangu wônsò uvwaye udituuta ku cikunakuna, divwa dyenza anu

mutooyi kadi ditungunuka. Kadi pakaavwaye walukila, uvwa udituuta ku cikunakuna cimwecimwe aci kadi kadiyi dyenzaku mutooyi nansha wa kânà to, bwalu bavwa bapayemu bintu bîmpè.

<sup>80</sup> Pa nanku ndi ngeela meeji ne aci cidi anu bu cya bushuwa, nwamonu's, mbwa twètù kuujiibwa tente ne bintu bîmpè bya Nzambi, bwa mamuma a Nyuma kumanyikilawu kutudi. Bu muvwaye uteela bikole Kolinto wa Kumpala 13 mwaba awu, ne mushindu udibi, ne: "Nansha mêmè mfila mubidi wanyi bwa kwoshiibwawu, ne mwikale ne bintu byônsò ebi, kadi nciyi ne dinanga to; bidi cyanaana, kabyena ne dikwacisha nansha dikese kûndi to." Nwamonu's, ke citudi baswe kwenza ncyôci aci.

<sup>81</sup> Kumutu kwa byônsò, misuuka yetu ya muntu ne muntu ke itudi bambwile bujitu kumpala kwa Nzambi. Nwamonu's, *wêwê* ngu—nguyaaya mu Dyulu. Kabyena ne *mêmè* nguyaaya anyi, anyi *yêyê* nguyaaya to. Uyaaya ng'*wêwê*, wamonu's, ne *wêwê* dyambedi. Nenku bidi bikengela bwa *wêwê* kukebulula byôbî ebi ne kushaala ne kalolo kumpala kwa Mukalenge.

<sup>82</sup> Nenku *mêmè* nkaadi mujandule misangu yônsò ne muntu udi udipwekesha awu ke udi Nzambi ubandisha. Paudi wangata muntu udi anu ne cyâdi citadika muulu ne mwikale mumanye bintu byônsò, ne *wêwê* kuyiku ne cyûdi mwa kumwambila to, ne mwikale ne madyambi, ne—ne, ee, awu—awu kadi ke muntu udi kayiku ne kwayaye to. Kadi angata muntu udi mudipwekeshe ne wenda ne kalolo awu.

<sup>83</sup> Mvwa nyiikilangana ne muntu mukwabo dîngà dituku, mwikale munkaci mwa kulongolola ekeleeziya mu... mutapuluke ne bulongolodi muvwaye usanganyibwa. Nenku, ee, m'Mwaneetu Boze, ne ekeleeziya uvwabo nende awu, bavwa ne ekeleeziya munene ukaavwabo nende kwine kwônsò aku awu, nenku Mukalenge mmumubeneshe. Pashiishe bantu kufikabo mu mushindu wa bajinga kushaala baa kapelu bu muvwa bakwabo bônsò abu, ne biikale bajinga kumwela mu bulongolodi kampana. Kadi paakenzabo aci, ke cyôci... beena Kilisto badipwekeshe abu kabavwa banange ciine aci to. Bôbò mu nsômbelu wabo yônsò, bavwa balongeshiibwe bibengangane ne cyôci aci, ke bôbò kupatukamu. Mpindyewu bakaadi ne kasumbu, ne Mukalenge mmubabeneshe mu mushindu wa ne, bakaadi bakabwela cyakabidi mpindyewu mu mwaba wa munene, bwa ekeleeziya mpindyewu udi wakidila bantu batwe ku binunu binaayi anyi bitaanu, nenku bakaadi bâbangulula.

<sup>84</sup> Ke kulwabo kûndi, bamba ne: "Mwaneetu Branham," tuvwa basômbèle anu mu bîrô mwamwa, bîrô bya ekeleeziya abi, dîngà dituku. Ke *yêyê* kwamba, umwe wa ku balombodi, Mwaneetu Carlson ne bakwabo abu, kwambabo ne: "Tudi ne cya kwenza cinyi?"

<sup>85</sup> Mêmè kwamba ne: “Petaayi muntu bwa kwikalaye mudishi wa mikooko udi kayi ne luumu nansha lukese mu dingumba dyônsò adi to, mwikale anu mwaneetu mwîmpè menemene, mushuwashuwale, wa kalolo, mudipwekeshe mwikale ne nsômbelu anu pa nsômbelu. Nzambi neatangile bikwabo bidi bishaala abi, nwamonu’s.” Mêmè kwamba ne: “Mpaasata mwîmpè wîkala yêyê anu udiisha mikooko, ne mudipwekeshe ne bikwabo, Nzambi neênzè bidi bishaala. Nwênù badidinge anu. . . Kî mmuntu munene cimanya-byônsò wa ubwalamu, ukeba kuteeka *cikampanda* mu bulongame, ne eci bikengela ciikale mushindu *kansanga*, mwikale ubondakajangana bidi kwaka ne bidi eku.” Mêmè kwamba ne: “Kabyakukumbanaku to. Apu kaayi nwobeshi.”

<sup>86</sup> Ke cyôci aci, kaamu kônsò mu ekeleeziya kadi ne cya kukwata mudimu pamwe ne tukwabo, ne nudi ne cya kutungunuka muntu ne muntu wenza wende mudimu mu cyôci aci. Ke bwa twêtù kumona cikondo citudi ne mwoyi. Tudi mwa kwikala tukaadi pabwîpî kupita mutudi twela meeji ne ke mutudi.

<sup>87</sup> Mpindyewu, tudi twanyisha Mwaneetu Vayle. Kî mmwômò anyi? [Disangisha didi dyamba ne: “Amen.”—Muf.] Mukalenge akubeneshe, Mwaneetu Vayle. Twasakidila. Kabidi tudi twela Mukalenge twasakidila bwa ditutwadila dya diyiisha dinene edi diloolo edi.

<sup>88</sup> Nunku ndi mupete kabeji kamfundila, kwênji ndambu wa tusunsa. Umwe wa ku bâna beetu baa bakaji úvwa ne cintu kampanda ciwaye ujinga kwamba, mu ciloota. Bu wêwê anu mwa kucimfundilaku, mwaneetu wa bakaji, ndi—ndi. . . M’Mumupe biloota kampanda bidi bulelela bwa kabuyi dyela mpatà to. Katutu twitaba biloota byônsò cyanaana to. To, to. Kadi padibi bya kudi Nzambi, tudi baswe kumanya ne awu n’Nzambi udi wakula neetu.

<sup>89</sup> Byenze mùdi bintu byônsò biikale byakula mu myakulu, katwena twitabuuja abi to; kadi padiku kulwa dyandamuna diikale ditwambila cintu kampanda ciikalà mwa kwenzeka, tucimôna cyenzeka, pa dîbà adi’s tudi twela Mukalenge twasakidila bwa cyôci aci. Nwamonu anyi?

<sup>90</sup> Tudi baswe kubilama byenda kakuyi lutatu, mu kalolo, ne mu bulongame bwa Mukalenge. Pa nanku vulukaayi anu ne, webe mudimu udi mwa kwikala ressort wa musinga munene awu, anyi udi mwa kwikala kaa kakese, anyi kalonda kaa dîbà kaa kakese aku, anyi kaamu kampanda kaa kakese, anyi kaamu kaa dyela naaku manuvele, cyônsò cidivu mwa kwikala aci, anyi udi mwa kwikala milonda idi pampala paa ntanku ayi, idî ileeja dîbà ayi. Kadi cyônsò cidivu aci, bidi bikengela bwa twêtù bônsò tukwate mudimu mu dipetangana ne Evanjeeliyo wa Yesu Kilisto, bwa kufikisha eci ku dyenzeka.



91 Anji elaaayibi anu meeji! Piikalabi ne mapà mmanene mushindu awu, citudi twètù tubiikila ne mbukole aci; kadi Pòlò yèyè wakamba ne: “Nansha mêmè mwikale ne diitabuujya dya mufwanyine kutuntumuna mukuna, kadi nciyi ne dinanga to, ndi cintu cyanaana.” Elanganayaaku meeji pa cyôci aci.

92 Nansha mutudi twamba ne: “Ee, nansha mêmè—mêmè ngumvwa . . . Ntu njinga ne ngikalakù mumanye Bible.”

93 “Nansha mêmè ngumvwa maalu masokoka ônsò a Nzambi, nwamonu’s, ne nansha mêmè mufwanyine kucyenza kadi nciyi ne dinanga to, ndi cintu cyanaana. Nwamonu’s, Ncyêna mwanji kufika kaaba nansha kamwe to.” Nwamonu’s, cya mushinga cidi ne, unange Nzambi, ne udipwekeshe ne ciine aci.

94 Mpindyewu, bushuwa, paanyima paa bidimu byônsò ebi mu budimi bwa bwambi ne mu buloba bujima, ne mwikale mmona bantu bashiileshiilangane, bivwa bikengela ngikaleku mumanye ndambu wa maalu pa bidi bitangila mushiku wa mbelu wa dibwelela. Nenu paudi muswe kufikaku mwaba kampanda ne Nzambi, kulekediku nyuma wa dyambu ulwa mu nyungulukilu webe to. Kulekediku budimu bubwela to. Nansha muntu kana yônsò ewu mwenze cinyi, piikalaye mu cilema, kwikadiku wîbaka meeji mabi a cyena bundu bwa kulwisha muntu awu to. Wamonu anyi? Ikala wèwè anu ne kalolo ne musangeelu. Wavuluka ne, Nzambi wakakunanga paucivwa mu mpekaatu. Nenu piikala Nyuma wa Nzambi munda mwebe, udi unanga mu kwabo muntu awu piikalabi ne yèyè ngudi mu cilema. Udi umona’s, umusambidile anu cyanaana, ne nunangangane muntu ne mu kwende.

95 Kumutu kwa byônsò, nunange Nzambi ne nunangangane muntu ne mu kwende. Ne nwikalaayi badipwekeshe kumpala kwa Nzambi ne mwaba unudi nusanganyibwa muntu ne mu kwende awu, nenu Nzambi neatubeneshe, ne kakwena mushindu wa kucinka biikalaYe mwa kwenza to. Pa ciibidilu pàkaadi ekeleeziya mubange kuvudija bûngì bwa bantu ne mubange kwenda kudyunda, anyi cintu kampanda cya nanku awu, pa dibà adi badi baseesuka ku cintu cilelela aci, cintu cilelela aci.

96 Nudi bamanye cyakenza ne bintu ebi byenzeke, pâncivwà anu mbangilaku ne Mukalenge kummwenekelaye kwinshi ku musulu kwaka ne kungambilaye ciine aci? Ne Mwaneetu Vayle wakamona cyôci aci, ngeela meeji, mu cibejibeji mu Canada, kukaadi bidimu byàbûngì, mwakamweneka Mwanjelo wa Mukalenge awu kwinshi ku musulu kwaka, civwa mmu Associated Press ne: “Bukênkè kabuyi buumvwika kumutu kwa mwambi wa pa kaaba, mwikale ubatiiza.” Kadi—kadi nudi bamanye cyakenzeja ciine aci anyi? Patwakenza disangisha dya mu ntenta anu dinsambu dya mùsèsù dyadya, ntenta uvwa ne myaba ya bantu basômba, kaa, batwe ku binunu bibidi ne nkama

itaanu, bambi bafumine myaba yônsò, bamba ne: “Mwaneetu, anji vwilabi apa tǔng.” Ncicivwa anu nsongalume, bu, kaa, anu mwânà’s. Ke yêyè kwamba ne: “Mmunyi mùdì ufika ku dilama bantu baba mu dīyì dimwe? Mbanangangane mu mushindu wa ne. . . Kacya nciwu mwanji kumonaku bantu banangàngàne nunku to.”

<sup>97</sup> Awu’s m’Mukalenge. Pa cyôci aci mpaakiibakiibwa ekeleeziya ewu, dinanga dya difwana dya Nzambi, dya bwânà bwetu dya muntu ne mukwende adi. Nkaadi mubamone mene balabulangana ku cyanza muntu ne mukwende, bashiyangana mwaba awu, badila myadi benze bu bânà baa mu maboko, pa kushiyangana muntu ne mukwende. Bavwa banangàngàne muntu ne mukwende bilenga bya kacya. Ne mêmè mvwa mwa kuya ku mbanza yabo bwa kubakumbula, ne mîngà misangu Bible uvwa muteeka mubuulula ne mubolesha kudi mamata a binsonji. Mbwelamu, mêmà a bufuku awu, muvwa baataatu ne baamaamu badisangishe, ne bânà baabo bakese beele cijengu panshi apu, batwe binù beele cijengu; ne baataatu ne baamaamu batwe binù, badila myadi basambila. Mvwa mwa kushaala mwimane ku ciibi aku kadi kwindila, kwindila, kwindila. Kadi pavwabo kabayi biimanyika disambila to, mvwa mwa kumba kusombela lwa pa bibandilu apu e kuditwa paanyi mu disambila, mêmè mwine, mu dibindila amu, nwamonu’s. Nenku ke—ke civwaku ncyôci aci. Nenku bavwa banangàngàne muntu ne mukwende. Bavwa banangàngàne muntu ne mukwende. Tuvwa ne ciibidilu cya kwimanyina kuulu biikale twimba musambu wa kale awu wa ne:

Mwonji udi uswikakaja myoyi yetu  
Mu dinanga dya bwena Kilisto ubeneshiibwe;  
Dyumvwangana dya meeji a buuwetu  
Ndifwanangane ne dya ku Dyulu.

Patudi tutapuluka,  
Bidi bitùpa dikenga munda;  
Kadi netwikale anu baswikakane mu myoyi,  
Ne ditekemena dya kusangila cyakabibi.

<sup>98</sup> Ndi ngamba ciine eci ne disanka divule mu mwoyi wanyi, bwa Kilisto. Bààbûngì baabo mbalaale mu nyungulukilu emu mu majambu adi ne myâkù mifundapu aa diloolo edi, bindile dibiishiibwa dinene adi mutwasangila cyakabidi.

<sup>99</sup> Kanulekediku nyuma awu uumuka kaaba aka to! Yêyè anu mudidinge muumuke, pa dîbà adi mpaasata wenu nansha mufwanyine kwikala ne ngaakwilu wa kapelu wa bishi, nansha mwikale uyiisha Diyì dya Nzambi bilenga bya bishi, Nyuma wa Nzambi ukaadi mubungamijiibwe muye. Nwamonu anyi? Bu twêtù mwa kwikala ne bintu byônsò mu dyumvwangana, mu kaaba kamwe, ne banangàngàne muntu ne mukwende, pa dîbà adi kaayi Nzambi neakwate neetu mudimu.

<sup>100</sup> Nenku twètù tudi balame dîbà, bwa bantu kwikalabo benza kulwa bamba ne: “Paudi muswe kumona ekeleeziya udi mudipwekeshe bulelela, ekeleeziya udi munange Nzambi bulelela, picilabi kuntu kwaka ku tabernacle wawa musangu kampanà kadi ubatangile. Tangilabi umone dikongangana didibo naadi kudi muntu bwa mukwende, kaneemu kiine’s; padi Evanjeeliyo uyiishiibwa, mushindu mwine udibo mu kaneemu, mushindu mwine udi bintu byònsò anu mu bulongame’s we.” Eyo, pa dîbà adi badi mwa kutangila ne kumona dîbà ditudi ne mwoyi. Nenumone Nyuma wa Nzambi ukwata mudimu munkaci mwenu, bimaanyinu binene ne maalu a kukema ne bikwabo nebiikale byenzeka. Cintu cyôci ne twamu twònsò tukwata mudimu cyapamwe, necyâmbè dîbà. Kadi cyôci kaciyi cikwata mudimu to, apu kaayi dîbà ndiimane, kacyakwamba kabidi dîbà to. Pa nanku twètù baswe kumanya ne ndîbà kaayi ditudi ne mwoyi, bangaayi anu kwenza ne bantu bònsò biikale bakwata mudimu cyapamwe mu Evanjeeliyo, banangàngàne muntu ne mukwende, banangè Nzambi, nenku milonda ya dîbà nkaayaayi neyileeje ne ndîbà kaayi ditudi ne mwoyi. Nudi nwitabuujà nanku anyi? [Disangisha didi dyamba ne: “Amen.”—Muf.] Cya bushuwa. Amen. Mukalenge anubeneshe, ne mabeneshà mabanjike.

<sup>101</sup> Kanwikadi nwâpwa mwoyi mpindyewu, tambakanaayi lumingu elu. Nenku nwênù bamanye yònsò wa ku babeedi badi baswe kulwa, nwâmwambilaayi, paalwaye, ne: “Munanga wanyi, ndi muswe kukulombaku. Tudi ne disambidilangana dya babeedi, mu dyalumingu mu dinda, ku tabernacle kwaka. Kadi peebe nyawu udi usaama kukaadi cikondo, mpindyewu ndi musweku . . .”

“Ee, ndi muswe kuya. Ntu anu mujingejinge kuya.”

<sup>102</sup> “Mpindyewu, ndi mfuma ku diteeleja diyiisha mu dyalumingu diloolo, dya kudi mwaneetu wawa, mushindu wutudi ne cya kwikala tutondelangana bilema byetu muntu ne mukwende, ne kusambidilangana muntu ne mukwende, bwa twamona mwa kwondopiibwa. Yakobo 5.14, 13, 14, 15, wamonu’s, bwa ne tudi ne cya kwikala tutondelangana bilema byetu muntu ne mukwende kumpala mene kwa kulwa bwa dyondopiibwa. Eyo. Tutondelangana bilema byetu muntu ne mukwende, ne tusambidilangana muntu ne mukwende.” Nwamonu anyi? Nwamonu’s, ke cyôci aci menemene civwaye wamba diloolo edi, mwikale utwangaja masanka a bantu ne Maako 16. Sambakaja byôbì abi pamwe, apu kaayi wâpecì cintu, pa dîbà adi dyondopa didi dyenzeka.

<sup>103</sup> Tangilaayi numone Yesu, kaciyi cîngà cintu to anu dintamfu dya dinanga. Nwamonu anyi? Yèyè uvwa Nzambi mumweneshiibwe. Yèyè, Nzambi, nguvwa muDileeje munda Mwende, kabivwa mwa kukemesha to muvwa bishima ne bikwabo byònsò byenzeka. Nsòmbelu Wende wa didipwekesha

awu, ne nsòmbelu mulàmbula; wa kuumuka ku diikala Nzambi, bwa kwikala muntu pa buloba apa, bwa kuleejila Nzambi ku Yèyè mwine. Ke civwa ciMwenze civwaYe aci. Nkaadi misangu yònsò mwambambe ne: “Civwà cyenze ne Yesu ikale Nzambi, bwanyi mèmè, mbwa mushindu wuvwaYe muDipwekeshe. Yèyè uvwa munene bikole, kadi paabi mwikale mwa kulwa mukese bikole.” Nwamonu anyi? Ncya bushuwa.

<sup>104</sup> Mukalenge anubeneshe anu bilenga bya menemene. Mpindyewu tujukilaayaaku kuulu, bwa kutangalaka. Twǎnjǎayi kuteeta musambu awu, (udi mufwanyine kwikala kuyi muwumanye to, mwaneetu wa bakaji), ne: *Mwonji Ûdi Ûswikakaja Ûbeneshiibwè*. Tùwimbàayi musangu umwepele, s'mwômò's? Tùpèeshàku cyona tǔng.

Mwonji udi uswikakaja myoyi yetu  
Mu dinanga dya bwena Kilisto ubeneshiibwe;  
Dyumvwangana dya meeji a buuwetu  
Ndifwanangane ne dya ku Dyulu.

<sup>105</sup> Mpindyewu patudi twimba cituminyi cya ndekeelu eci apa, tukwatanganaayi ku byanza muntu ne mukwende ne, “*patudi tutapuluka*,” kadi biikale twamba anu ne: “Nzambi akubeneshe, mwaneetu wa balume, mwaneetu wa bakaji. Ndi ne disanka dǐngì dya kwikala neebe kaaba aka diloolo edi.” Nwamonu's, cintu cya mushindu awu, pashiishe ukudimuke ku luseke lwebe pa dǐbà adi. Mpindyewu, tùwimbàayaaku.

Patudi tutapuluka . . .

Nzambi akubeneshe, Mwaneetu Neville!

Bidi bitùpa dikenga munda;  
Kadi netwikale anu baswikakane mu myoyi,  
Ne ditekemena dya kusangila cyakabidi.

<sup>106</sup> Mushindu mwine wutudi banange Mukalenge Yesu's we! Kì mmwômò anyi? [Disangisha didi dyamba ne: “Amen.”—Muf.] Mushindu mwine . . .

Too ne patwasangila!  
Too ne patwasangila ku makàsà a Yesu; (too ne  
patwasangila!)  
Too ne patwasangila! too ne patwasangila!  
Nzambi ikale neenu too ne patwasangila  
cyakabidi!

Tubwitaayaaku kwìsù, ne tùwimbàayi anu mu Nyuma mpindyewu.

Too ne patwasangila! too ne patwasangila!  
Too ne patwasangila ku makàsà a Yesu;  
Too ne patwasangila! too ne patwasangila!  
Nzambi ikale neenu too ne patwasangila  
cyakabidi!

<sup>107</sup> Mpindyewu ne mitu yetu miinyika. Twètù's tudi anu bânà, bânà baa Nzambi. Tùwimbilaayaaku mu matama. [Mwaneetu Branham ne disangisha baabangi kwimbila mu matama, *Nzambi Ìkalè Neenù*—Muf.] Kaa, mushindu mwine wudi aci citutwadila Nyuma wa Nzambi's we! Nudiku mwa kudifwanyikijila matuku a ku cibangidilu pavwabo bàsòmba pa bipese bya mabwe anyi?

Nzambi ikale neenu too ne patwasangila  
cyakabidi!

<sup>108</sup> Ne mitu yetu miinyika, nêndombè Mwaneetu Allen lwa paanyima pààpa, mwaneetu mupyamupya munkaci mwetu, ne ùdikù mwa kututangalaja ne mwaku wa disambila. Mwaneetu Allen.



*DIPWEKÈSHÈ* LUA63-0714E

(Humble Thyself)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu diloolo, mu matuku 14 a ngondo wa mwandamutekete, cidimu cya 1963, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2017 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)